

con unna particolaritae: a porta a l'èa sempre averta perché porta no ghe néa.

A-a seja tiavan zu a serracinesca e bonn-a neutte! In çimma a-a montà do Fondego 'na baracchetta de legno a vendeiva bibite analcoliche comme citrato, aegua de selz e gazeu.

Restemmo a De Ferrari e chinemmo verso ciasa Neuva passando pe via Sellai (oa Boetto) pe trovà Schaffner de faccia a-o Paxo; tiemmo sciu verso via Petrarca e arrivemmo sotto a-a *Borsa Valori* pe bagnàse o becco into caffè omonimo.

Se fise tardi, doppo çenn-a, andiescimo a-o Ragno d'Ou a vedde un spettacolo da Borsa d'Arlecchin.

Lascemmo perde o cine e l'Olimpia, servio da un bar (oa serròu) primma de chinà a scaa, e traversemmo via XX Settembre davanti a-o *Grande Italia* con tavolin e vetrate: no aspettemmo che ghe vegne 'na banca (tanto pe cangià) e verso i Magazzin Sempion in çimma de via Ettore Vernazza trovemmo Giavotto (ch'o l'é ascì in caroggio do Fi) pe piggiassene un gottin de quello bon.

O Caffè Bardi da-o pronao do Tiatro Carlo Felice o vedde in scia ciassa, vixin a-o monumento a Garibaldi, e fioriste con e grosse cavagne a forma de clessidra.

In Galleria Mazzini chi se sovegne da Birreria Zolezzi con l'orchestra de damme viennexi a-o posto do Ristorante Europa? Quaexi un Florian zeneise in to nostro piccin.

Sciortimmo a Corvetto e, pe fortun-a trovemmo Mangini (alloa Mangini & Gismondi) ma in fondo a via Assarotti no gh'é ciù Pallavidino & Proto: punto de ritreuvo e de quarche ciaeto de omni de banca, de commercio e d'affari. A-a giornà d'ancheu gh'é a buttega de demoe, a Befana de Baccanti o *décor* interno e l'é ancon quello de l'antigo caffè.

Foscia Zena a l'èa 'na çittae luvega primma de l'urtima guaera, ma i locali no mancavan. A-o Portello Preti o l'aveiva averta un grande caffè-pasticceria con o *tea room* a-o primmo cian; mae mamà e a scia Norcia avieivan posciùo godise o traffego de 'na çittae ch'a se ciammava *Grande Genova*.

In ciassa Fontann-e Marose o Caffè Venchi o l'èa un locale storico e noiatri zeneixi aviescimo dovùo impedì ch'i diventesse 'na banca (e daghela!).

Son stufò d'èse nostalgico, solo quarche nomme pe no scordàse.

A Taverna di quattro venti in corso Buenos Aires; Cavo in via Brigata Liguria vixin a-o Palazzo da Nafta; Laiolo in via Lomellini; Moretti in San Donòu.

Ma o Giardin d'Italia no posso scordàlo. Devo ricordàlo, comme o ricordo tutte e votte che imbocco via XII Ottobre. O l'èa lì. Estae e inverno, de giorno e de seja. Tanti compagni d'A Compagna ghe son passae.

Inte certe occaxioin me pà de intravedili, ma foscia son ombre che fan finta de ninte. I tempi son cangiae, pensemmo a-o doman!

#### ILLUSTRAZIONI

Alle pagine 12 e 13: affiches e locandine pubblicitarie d'epoca.

